



C A P U T I.

De Natura Statuque hominum morali.

I.

Natura inde dicta est, quod *nasci aliquid faciat**, & recte definitur, quod sit, principium actuosum entis internum.

* *Servius ad Virgil. Georg. II. 49.*

II. Quod non est, producere aliquid non potest; igitur est manifestum quamdam ab æterno extitisse naturam.

III. Hæc æterna natura, si fortuita dicatur & contingens, rationem sufficientem in se ipsa non habet, ex quo consequitur, ut non tantum æternæ, sed etiam necessariæ, atque independentis naturæ existentia admittenda sit.

IV. Natura necessario & per se existens neque mutari, neque interire potest, adeoque infinita est, ac simplex, una, immensa, interminata, & omnia, quæ eidem inesse possunt, absolute sine ullo gradu simul possidens.

V. Nemo non videt mundum esse ens compositum, ac mutabile; igitur caret proprietibus primæ omnium naturæ.

VI. Sed nec primæva mundi stamina hanc sibi vindicant dignitatem. Semper enim aliqua indigebant effectrice causa, ut his po-

A

tius,



tius, quam tot aliis possibilibus concursionibus inter se cohærescerent, atque hanc causam primam totius universi DEUM nominamus.

VII. Id ipsum ab entis infiniti possibilitate, a pulchritudine & ordine hujus universi, ab unanimi omnium populorum consensu, & tandem a summa hujus sententiæ utilitate aliis demonstrari posse visum est.

VIII. Ex his patet, cur Deus, qui omnia nasci fecit, *natura naturans*, & mundus, qui vim sibi a Deo tributam innumeris exserit modis, *natura naturata* nominetur.

IX. Ob eandem causam vires motrices cuiusvis entis existentis *naturæ* vocantur *particulares*, quæ, quum a tota essentia separari nequeant nisi cogitatione, ideo etiam *rei essentiæ naturæ* nomen tributum est.

X. Porro *Naturale* est, quidquid vel ex entis cuiusdam notione seu conceptu primo, vel ex ejus essentia actu existente, vel ex principio rei cuiusdam actuoso proficiscitur: abitque in *absolutum* & *hypotheticum*, *essentiale* & *non essentiale*, sive *naturale in specie*.

XI. Quæcunque homini competit, ea partim ex notione *animalis*, partim ex notione *rationalis* declarari atque intelligi possunt: in his igitur posita est hominis essentia, atque *natura*.

XII. Rursus *animalis* essentia duas involvit partes *corpus* atque *animam*. Illud ex concep-



ceptu machinæ mechanico - pyrobolico - hydraulicae sufficienter explicatur.

XIII. Sanum corpus dicitur, si singula ejus membra nativis functionibus suis efficiendis apta sint, secus est morbosum; insunt ergo corporis motibus suæ *Regulæ*, sive *Repræsentationes determinationum rationi conformium*.

XIV. Si plures ad idem præstandum tendunt, concordant, secus discordant; variorum concordia est **PERFECTIO**, discordia **IMPERFECTIO**; utraque est *essentialis*, *naturalis*, *accidentalis*, *simplex*, *composita*, *privativa* & *positiva*. Inde & de corporis perfectione judicandum.

XV. Quidquid in ente reperitur, vel est cum eo consentiens, vel non est; illud adfert perfectionem, *bonum*, hoc imperfectionem, *malum*; medium igitur inter utrumque statuere absurdum est.

XVI. Anima generatim est *ens sui rerumque extra se positarum consciū*, & teste experientia, sentit, imaginatur, ac fingit.

XVII. Sensus hisce subjacet Regulis, *ut si res externæ non agant in sensuum instrumenta, nunquam oriri possint Ideaē seu perceptiones*; ac contra, *ut positæ in organis sensoriis, nullo morbo laborantibus, mutationi necessario respondeat Idea sensualis*.

XVIII. Phantasia ad eum se adtemperat modum, *ut præsentibus rerum imaginibus quibuscumque aliæ vel ante simul haustræ, vel iisdem similes integræ aut pro parte, sive in vigilii, sive in somniis recurrere possint*.



XIX. Ut adjuvetur imaginatio , oportet ideam reproducendam clare , recenter , aut sæpius percipere , aliam perceptionem eidem sociam adjungere , sensationem contrariam fortem vitare , denique ad illam non nisi post habitas alterius generis ideas debiliores reverti .

XX. Observamus præterea in anima nisum , atque conatum , quo alias perceptiones sensuales reproducere , alias vero abigere molitur ; si prius fiat , anima dicitur appetere , & si posterius aversari ; habet igitur appetendi , & aversandi facultatem sensitivam .

XXI. Est autem hæc appetitus regula , ut simul ac objecta species cuiusquam est , appetat omne animal , quod bonum sibi futurum cogitat , averseturque contraria .

XXII. Sæpe tamen omne animal citra cogitationem ad aliquid adipiscendum aut propulsandum stimulatur . Insunt igitur in illo quædam propensiones seu stimuli naturales , & prima naturæ , quæ sensum internum , dein cogitationem boni , vel mali , & demum appetitum , vel aversionem progignunt .

XXIII. Bonos esse hosce instinctus nulla dubitatio est , siquidem animantium essentiaz , ac conservationi congruunt , sed ab inclinationibus adventitiis , quæque ex sensuum externorum perceptionibus oriuntur , probe distinguui debent .

XXIV. Quoties appetitus , vel aversatio sensitiva ita augentur , ut vel unius , vel alterius



rius detur prædominium, anima dicitur sub-
esse affectui seu perturbationi.

XXV. Si vehementiores hujusmodi com-
motiones fiant in appetendo, affectus sunt
grati, si in aversando, *ingrati*, illi ad *lætitiam*
& *cupiditatem*, hi ad *tristitiam*, & *terrorem* re-
ducuntur.

XXVI. Quando anima in rem aliquam ne-
que propendet, neque ab illa abhorret, dici-
tur esse *indifferens*; sed si pares aliquid optandi,
aut fugiendi rationes videantur, est in *æquilibrio*.

XXXII. Manifestant sæpe animalia habitas
perceptiones, imaginationes, appetitus & af-
fectus, & eatenus iis tribuitur *loquela*. Om-
nes hæc facultates utpote brutis communes
vocantur *inferiores*, eas excipiunt facultates
hominum propriæ *superiores* adpellatæ.

XXVIII. Præstant nimirum homines bru-
tis, quod non modo res, quæ sub sensu ca-
dunt, sed etiam insensibiles, atque incorpo-
reas sibi repræsentare, & hinc ad illas *attende-*
re, desuper *reflectere*, & quidnam cum aliis
entibus commune habeant, *intelligere* possint.

XXIX. Sed magis adhuc excellit animæ hu-
manæ dignitas, quod notionum universalium
similitudines videt, rerum nexum perspicit,
atque ideas diversas inter se componit, & ha-
rum facultatum, id est *ingenii*, *rationis*, & *ju-
dicii* usu rerum inter se repugnantiam seu *fal-
sitatem*, & a repugnantia vacuitatem, verbo
veritatem deprehendit.



XXX. Qui veritatis, aut falsitatis rationem sufficientem reddere potest, is cognitionem certam habet, atque evidenter, qui non potest, ejus cognitio incerta est, & opinio dicitur; cognitionis absentia est ignorantia, & ideæ ab objecto discrepantia, error.

XXXI. Facultas appetendi, & aversandi, si ab intellectu, ratione & judicio determinari potest, voluntas est & noluntas, seu declinatio; velle igitur, aut nolle in eo non concipitur, qui caret usu rationis.

XXXII. Ratio sufficiens volendi aut nolendi dicitur motivum, seu momentum, itaque non nisi boni convenientis, aut inconvenientis mali judicia, volitionis, seu nolitionis sunt momenta.

XXXIII. Errant saepe homines in judicando, quare bona tantum opinata ad vera mala, mala tantum opinata ad vera bona spectant: igitur etiam motiva sunt vel *genuina*, vel *spuria*.

XXXIV. Bonum minus quod est majoris impedimentum, adfert imperfectionem, & malum minus, quod majus excludit, causa est perfectionis, tunc igitur bonum minus est comparative malum, & malum minus comparative bonum.

XXXV. Quoniam perfectio est concordia plurium in uno, consequens est, ut posita appetitus sensitivi cum rationali, aut volitionum vel nolitionum ipsarum inter se contrarietate, exsulet perfectio.

XXXVI.



XXXVI. Fiunt in homine plurimæ mutations, quæ si in illo ipso rationem habent sufficientem, *actiones*, si in alio *perceptiones* adpellantur. Sunt vero actiones vel in anima, vel in corpore, vel in utroque simul, id est *internæ*, *externæ*, aut *mixtæ*.

XXXVII. POSSIBILE homini generaliter est, quod nullam in eo ponit repugnantiam, ergo physice possibile, quod viribus hominis haud repugnat. Inde patet, quid physice impossible sit. Cujus contrarium est impossibile, id est necessarium, quod vero nec impossibile est nec necessarium, est contingens. In specie subjective contingens dicitur, quod ita possibile est, ut etiam ejus oppositum respectu virium nostrarum fieri possit.

XXXVIII. Impossibile, & necessarium vel simpliciter tale est, vel hypothetice, ac cum adjunctione, si quid aliud adipisci, aut effugere velimus. Necessitas simplex vel interior est, vel exterior, seu coactio physica; utraque excludit contingentiam, quæ tamen cum necessitate hypothetica perdurat.

XXXIX. PRINCIPIUM est id, quod rationem alterius in se continet, & ita dividitur, ut sit vel *possibilitatis*, vel *existentiæ*, vel *cognitionis*, dein *internum*, *externum*, *efficiens*, & *removens*.

XL. SPONTANEITAS late accepta est facultas entis per principium *efficiens internum* aliquid agendi sine externa quadam vi, stricte ve-



ro spontaneitas, seu nudum arbitrium, est quæ ad actiones physice & subjective contingentes competit.

XLI. Quoniam fiunt actiones in ipso homine, gaudet hic primum sponteitate latius sumta, sed quia in agendo attendere & refleßere, vel utrumque omittere tuto potest, gaudet etiam arbitrio.

XLII. Quemadmodum ad voluntatem ratio, ita ad rationem attentio requiritur, sed attentionis actus arbitrarii sunt, ergo & voluntatis.

XLIII. Quare nulla in voluntatem cadit interna necessitas, nec coactio physica, sed quæ coacta dicitur voluntas coactionem patitur tantum hypotheticam, & cum adjunctione.

XLIV. Arbitrium, quod rationis ope determinari potest, liberum dicitur, seu LIBERTAS; homo igitur, qui rationis usum habet, libertate est præditus.

XLV. Etsi vero intellectus rebus evidentiibus assentiri, voluntas vero generatim in id inclinare, quod videtur bonum, aut fugere, quod videtur malum, debeat; salva tamen est facultas rei certitudinem penitus examinandi, tum de ejus bonitate, aut malitia peculiariter consultandi, & se se interim cohibendi, in quo libertas sita est.

XLVI. Inde fluunt novæ actionum divisiones: aliæ enim sunt *animales*, hominis, aliæ *humanae*. Illæ iterum in nude *arbitrarias*, &

ne-



necessarias, hæ in *intellectuales*, *voluntarias*, *liberas* aut *mixtas* abeunt. Quare *intellectus*, *voluntas* & *libertas actionum humanarum* sunt principia.

XLVII. *Actio*, quæ ab *ingenti motivorum exsuperantia proficiscitur*, *uironea* est sive *lubens*, & *plane voluntaria*, *secus* est *invita*; quod si *minis extorquetur*, *invita ob violentiam secundum quid*, si ab *errante*, aut *ignaro fuerit suscepta*, *invita per errorem audit*.

XLVIII. In omni *actione libera* primo quis se ad *agendum determinat*, dein *actionem exsequitur*, quam *prætermittere* etiam potest, ideo *libertas datur determinationis, executionis, & contradictionis*; datur & *libera cessatio*, seu non factum.

XLIX. Recensitæ hactenus humanæ dotes inutiles forent sine aliorum auxilio, quare *indita* est cuique *socialitatis appetitio*, quam *summopere adjuvat facultas Sermonis*, seu *cogitata sua sonis articulatis aliisve signis clare, & distincte manifestandi*.

L. Ex dictis appetit tripliciter considerari hominis naturam; I. ut est *notio animalis rationalis*, II. ut *essentia ejusdem existens*, III. ut est *vis corporis ac animæ, quæ mutationum rationem continet*. Atque hæ *acceptiones etiam τω naturali applicandæ sunt*.

LI. *Impropiæ vero naturæ vocabulum pro ingenio, indole, consuetudine, temperamento, generatione, & nativitate usurpatur*; hæc enim om-



nia nos ad aliquid faciendum proclives redunt.

LII. Verum hæ proclivitates non ita comparatæ sunt, ut homini libertatem auferant. Potest enim principiis obstatre, melius expendere agendi momenta & inclinationes malas in bonas commutare.

LIII. Ad id attendere neglexerunt non pauci, qui propriam hominis naturam, quæ in ratione posita est, cum propensionibus contractis confundere, & falso ex fundamento, quæ homini naturalia sint, deducere non dubitarunt.

LIV. STATUS est complexus determinacionum, quæ de re quadam ut existentes enuntiari possunt; & primo in naturalem, & præternaturalem, seu adventitium abit; dein naturalis est absolutus, vel hypotheticus, tum essentialis, & non essentialis, seu naturalis in specie; uterque vero vel internus, vel externus. Et inde quid & quotuplex sit corporis, animæ & hominis status, colligendum.

LV. Præterea determinationes, quæ non pendent a libertate, statum *physicū*, quæ vero ad actiones liberas, seu MORES referuntur, statum *moralementum* constituunt. * Hic iterum consideratur vel ut *antecedens* est actiones, vel *consequens*, tum *antecedens*, vel ut *perfectus* in homine rationis compote, vel *imperfectus*. ** in infante aut demente. &c.

CA-

* Cicer. de Faz. init.

** Vid. Exercitation. meam de Nat. statuque hominum morali.